



28.09.2022

UKA2022/123

Uunga siunnersuut: Nuup kiisalu Qasigiannuguit Aasiaallu pilersorneqarnerannut erngup nukinganic nukissiorfinnik taakkunungalugu atatillugu atortunik sanaartornermut, aningaasalersuineranut ingerlatsinermullu killiliussatut atugassarititaasut pillugit Inatsisartut inatsisaata allangortinneqarnissaa pillugu Inatsisartut inatsisaat.

(Nunalerineranut, Imminut Pilersornermut, Nukissiuutinut Avatangiisinullu Naalakkersuisoq)

Nuup kiisalu Qasigiannuguit Aasiaallu pilersorneqarnerannut erngup nukinganic nukissiorfinnik taakkunungalugu atatillugu atortunik sanaartornermut, aningaasalersuineranut ingerlatsinermullu killiliussatut atugassarititaasut pillugit inatsisartut inatsisaata allangortinneqarnissaa pillugu Inatsisartut inatsisisaattut siunnersuut Nunalerineranut, Imminut Pilersornermut, Nukissiuutinut Avatangiisinullu Naalakkersuisup saqqummiussaanut imatut Naleqqamiit oqaaseqarfigissavarput.

Qasigiannuguit Aasiaallu siornatigut ukiunut ikittuinnarnut akilersortussanngorlugu misissuisimane-rigaluaq aammalu periarfissarsiornera akilersinnaangitsutut isigineqarluni periarfissaqanngitsutut illuni attartorsinnaaneq uggornaraluartumik killiffiusarsimagaluarpoq. Tassami aningaasat at-tartorsinnaanagit inissisimanermi qitiusumiit Nunatta karsianiit nammineq akilertussanngorlugit inissittoqartuuppat imaaliillaanaq pilersinneqarsinnaanissaa qularnarsigaluarpoq.

Maannakkullu Nunalerineranut, Imminut Pilersornermut, Nukissiuutinut Avatangiisinullu Naalakkersuisup suligasuarnermigut aammalu periarfissarsiornermigut akilersinnaassusaa qulaajarlugu ukiunut amerlanerusunut siaarnerani inuiaqatigiinnut minnerunngitsumik kinguaariinnut iluanaarutaasussanngorlugu torrallalluinnarlugu nutaamik eqqarsarluni aaqqi-simanera siornatigut Naleqqamiit nersualaarsimavarput taamaasilluni qulakkeermagu Qasigiannuguit Aasiaallu aamma ineriartornermut peqataaginnaratik aamma mingutitsiffiunngitsumik nukissiuute-qalerlutik inissisimalissammata taamaasillunilu avataaniit uulianik eqqussuineq akitigut ni-kerartaqisoq annikkinnerulersinneqassalluni pilersinneratigut.



Naleraq

Naalagaaffinngornissarput Naleqqamiit kissaatitta annersaraat aammalu inuiaat nammineq pilersornerusinnaanerat pingaartitaralutigu taammaammalu Naalackersuisooqataanitsinni siunnerfiuneqarluni aqqissuunneqarnera apeqqusinngilluinnarlugu tapersorsorsimavarput.

Taamatullu erngup nukinganik taamatut innaallagissiorniarneq aningaasalersorneqarnissaanut taarsigassarsiamut sanaartornermut ujaasisoqarnissaa tapersorsorlugulu Naleqqamiit peqataaffigisimavarput maannakkullu inatsimmi tunngavissaq tamanna naammattumik annertussuseqanngitsoq periarfissarsiornermi ersarissisimavoq.

Taamatullu ulluni makkunani Rusland Ukrainimut saassussinerata kingorna maluginiagssaavoq aningaaserivinni attartukkani erniat ilaatigut qaffattaarlutik nikerartut taamaammallu Naalackersuisoq periarfissarsiornermini attartugassat aningaasarpasuit pillugit akikinerusumik erniaqartumik periarfissarsiorluni isumaqatigiissuteqarsimanera suleriallaqqinnermik takutitsiffiusoq assut toqqissiallannarpoq aningaasarpasuummi pineqarmata.

Pilersaaruserluagaasumik aammalu aningaasatigut kingunerisinnaasai tamaasa qulaajaqqissaarlugit sapinngisamik akikinnerpaamik aningaasalersuinissaq qulakkeerniarlugu sulineq inuiaqatigiinnut kinguaanut iluaqutaasussamik suliap inatsisit aporfiusut naleqqussarlugit aqqissuunneri Naleqqamiit pissusissamissortutut isigalutigu tapersiinerput oqaatigissavarput.

Taamatut Naleqqamiit oqaaseqarluta Inatsisartut inatsisaata allanngortinneqarnissaa pillugu Inatsisartut inatsisaat akueralutigu ataatsimiititaliamut susassaqtumut ingerlatseqqipparput.